

南無華嚴會上佛菩薩（三稱）

大方廣佛華嚴經卷第四十四

十通品第二十八

爾時，普賢菩薩摩訶薩告諸菩薩言：「佛子！菩薩摩訶薩有十種通。何者為十？佛子！菩薩摩訶薩以他心智通，知一三千大千世界眾生心差別。所謂：善心、不善心、廣心、狹心、大心、小心、順生死心、背生死心、聲聞心、獨覺心、菩薩心、聲聞行心、獨覺行心、菩薩行心、天心、龍心、夜叉心、乾闥婆心、阿修羅心、迦樓羅心、緊那羅心、摩睺羅伽心、人心、非人心、地獄心、畜生心、閻魔王處心、餓鬼心、諸難處眾生心……，如是等無量差別種種眾生心，悉分別知。如一世界，如是百世界、千世界、百千世界、百千億那由他世界，乃至不可說不可說，佛剎微塵數世界中所有眾生心，悉分別知。是名：菩薩摩訶薩第一善知他心智神通。」

佛子！菩薩摩訶薩，以無礙清淨天眼智通，見無量不可說不可說，佛剎微塵數世界中眾生，死此生彼，善趣惡趣，福相罪相，或好或醜，或垢或淨……，如是品類無量眾生。所謂：天眾、龍眾、夜叉眾、乾闥婆眾、阿修羅眾、迦樓羅眾、緊那羅眾、摩睺羅伽眾、人眾、非人眾、微細身眾生眾、廣大身眾生眾、小眾、大眾……，如是種種眾生眾中，以無礙眼，悉皆明見。隨所積集業、隨所受苦樂、隨心、隨分別、隨見、隨言說、隨因、隨業、隨所緣、隨所起，悉皆見之，

無有錯謬。是名：菩薩摩訶薩第二無礙天眼智神通。

佛子！菩薩摩訶薩，以宿住隨念智通，能知自身，及不可說不可說，佛剎微塵數世界中一切眾生，過去不可說不可說，佛剎微塵數劫宿住之事。所謂：某處生、如是名、如是姓、如是種族、如是飲食、如是苦樂。從無始來，於諸有中，以因以緣，展轉滋長，次第相續，輪迴不絕，種種品類、種種國土、種種趣生、種種形相、種種業行、種種結使、種種心念、種種因緣受生差別……，如是等事，皆悉了知。又憶過去，爾所佛剎微塵數劫，爾所佛剎微塵數世界中，有爾所佛剎微塵數諸佛，一一佛如是名號、如是出興、如是眾會、如是父母、如是侍者、如是聲聞、如是最勝二大弟子，於如是城邑、如是出家，復於如是菩提樹下成最正覺，於如是處，坐如是座，演說如是若干經典，如是利益爾所眾生，於爾所時住於壽命，施作如是若干佛事，依無餘、依般涅槃界而般涅槃，般涅槃後，法住久近……，如是一切，悉能憶念。又憶念不可說不可說，佛剎微塵數諸佛名號，一一名號，有不可說不可說佛剎微塵數佛，從初發心、起願修行、供養諸佛、調伏眾生、眾會說法、壽命多少、神通變化，乃至入於無餘涅槃、般涅槃後，法住久近、造立塔廟、種種莊嚴、令諸眾生種植善根，皆悉能知。是名：菩薩摩訶薩第三，知過去際劫宿住智神通。

佛子！菩薩摩訶薩，以知盡未來際劫智通，知不可說不可說，佛剎微塵數世界中所有劫。一一劫中所有眾生，命終受生，諸有相續，業行果報，若善、若不善；若出離、若不出離；若決定、若不決定；若邪定、若正定；若善根與使俱、若善根不與使俱；若具足善根、若不具足善根；若攝取善根、若不攝取善根；若積集善根、若不積集善根；若積集罪法、若不積集罪法……，如是一切，皆能了知。又知不可說不可說佛剎微塵數世界，盡未來際，有不可說不可說佛剎微塵數劫。一一劫，有不可說不可說佛剎微塵數諸佛名號；一一名號，有不可說不可說佛剎微塵數諸佛如來；一一如來，從初發心、起願立行、供養諸佛、教化眾生、眾會說法、壽命多少、神通變化，乃至入於無餘涅槃、般涅槃後，法住久近，造立塔廟、種種莊嚴；令諸眾生種植善根……，如是等，悉能了知。是名：菩薩摩訶薩第四，知盡未來際劫智神通。

佛子！菩薩摩訶薩，成就無礙清淨天耳，圓滿、廣大、聰徹、離障、了達、無礙、具足、成就，於諸一切所有音聲，欲聞、不聞，隨意自在。佛子！東方有不可說不可說佛剎微塵數佛，是諸佛所說、所示、所開、所演、所安立、所教化、所調伏、所憶念、所分別，甚深廣大，種種差別、無量方便、無量善巧清淨之法，於彼一切，皆能受持。又於其中若義、若文、若一人、若眾會，如其音辭，如其智慧，如所了達，如所示現，如所調伏，如其境界，如其所依，如其出道。

於彼一切，悉能記持，不忘不失，不斷不退，無迷無惑；為他演說，令得悟解，終不忘失一文一句。如東方，南、西、北方，四維上下，亦復如是。是名：菩薩摩訶薩第五，無礙清淨天耳智神通。

佛子！菩薩摩訶薩住無體性神通、無作神通、平等神通、廣大神通、無量神通、無依神通、隨念神通、起神通、不起神通、不退神通、不斷神通、不壞神通、增長神通、隨詣神通。此菩薩，聞極遠一切世界中諸佛名，所謂：無數世界、無量世界，乃至不可說不可說，佛剎微塵數世界中諸佛名。聞其名已，即自見身在彼佛所。彼諸世界或仰或覆，各各形狀，各各方所，各各差別，無邊無礙；種種國土、種種時劫，無量功德各別莊嚴。彼彼如來於中出現，示現神變，稱揚名號，無量無數，各各不同。此菩薩一得聞彼，諸如來名，不動本處，而見其身在彼佛所，禮拜尊重，承事供養，問菩薩法，入佛智慧，悉能了達諸佛國土、道場、眾會，及所說法，至於究竟，無所取著。如是，經不可說不可說佛剎微塵數劫，普至十方而無所往，然詣佛剎觀佛、聽法請道，無有斷絕，無有廢捨，無有休息，無有疲厭；修菩薩行，成就大願，悉令具足，曾無退轉，為令如來廣大種性，不斷絕故。是名：菩薩摩訶薩第六住無體性、無動作、往一切佛剎智神通。

佛子！菩薩摩訶薩，以善分別一切眾生，言音智通，知不可說不可說佛剎微塵數世界中，眾生種種言辭。所謂：聖言辭、非聖言辭、天言辭、龍言辭、夜叉言辭、乾闥婆、阿修羅、迦樓羅、緊那羅、摩睺羅伽、人及非人，乃至不可說不可說眾生所有言辭，各各表示，種種差別，如是一切，皆能了知。此菩薩隨所入世界，能知其中一切眾生所有性、欲，如其性、欲，為出言辭，悉令解了，無有疑惑。如日光出現，普照眾色，令有目者悉得明見。菩薩摩訶薩亦復如是，以善分別一切言辭智，深入一切言辭雲；所有言辭，令諸世間聰慧之者，悉得解了。是名：菩薩摩訶薩第七，善分別一切言辭智神通。

佛子！菩薩摩訶薩以出生無量阿僧祇，色身莊嚴智通，知一切法，遠離色相，無差別相，無種種相，無無量相，無分別相，無青、黃、赤、白相。菩薩如是入於法界，能現其身，作種種色。所謂：無邊色、無量色、清淨色、莊嚴色、普偏色、無比色、普照色、增上色、無違逆色、具諸相色、離眾惡色、大威力色、可尊重色、無窮盡色、眾雜妙色、極端嚴色、不可量色、善守護色、能成熟色、隨化者色、無障礙色、甚明徹色、無垢濁色、極澄淨色、大勇健色、不思議方便色、不可壞色、離瑕翳色、無障闇色、善安住色、妙莊嚴色、諸相端嚴色、種種隨好色、大尊貴色、妙境界色、善磨瑩色、清淨深心色、熾然明盛色、最勝廣大色、無間斷色、無

所依色、無等比色、充滿不可說佛剎色、增長色、堅固色、攝受色、最勝功德色、隨諸心樂色、清淨解了色、積集眾妙色、善巧決定色、無有障礙色、虛空明淨色、清淨可樂色、離諸塵垢色、不可稱量色、妙見色、普見色、隨時示現色、寂靜色、離貪色、真實福田色、能作安隱色、離諸怖畏色、離愚癡行色、智慧勇猛色、身相無礙色、遊行普偏色、心無所依色、大慈所起色、大悲所現色、平等出離色、具足福德色、隨心憶念色、無邊妙寶色、寶藏光明色、眾生信樂色、一切智現前色、歡喜眼色、眾寶莊嚴第一色、無有處所色、自在示現色、種種神通色、生如來家色、過諸譬喻色、周偏法界色、眾皆往詣色、種種色、成就色、出離色、隨所化者威儀色、見無厭足色、種種明淨色、能放無數光網色、不可說光明種種差別色、不可思香光明超過三界色、不可量日輪光明照耀色、示現無比月身色、無量可愛樂華雲色、出生種種蓮華鬢雲莊嚴色、超過一切世間香燄普熏色、出生一切如來藏色、不可說音聲開示演暢一切法色、具足一切普賢行色。

佛子！菩薩摩訶薩，深入如是無色法界，能現此等種種色身，令所化者見，令所化者念，為所化者轉法輪；隨所化者時，隨所化者相，令所化者親近，令所化者開悟，為所化者起種種神通，為所化者現種種自在，為所化者施種種能事。是名：菩薩摩訶薩為度一切眾生故，勤修成就第八無數色身智

神通。

佛子！菩薩摩訶薩以一切法智通，知一切法無有名字，無有種性。無來無去、非異非不異、非種種非不種種、非二非不二、無我無比、不生不滅、不動不壞、無實無虛、一相無相、非無非有、非法非非法、不隨於俗非不隨俗、非業非非業、非報非非報、非有為非無為、非第一義非不第一義、非道非非道、非出離非不出離、非量非無量、非世間非出世間、非從因生非不從因生、非決定非不決定、非成就非不成就、非出非不出、非分別非不分別、非如理非不如理。

此菩薩不取世俗諦，不住第一義，不分別諸法，不建立文字，隨順寂滅性。不捨一切願，見義知法，興布法雲，降霆法雨。雖知實相不可言說，而以方便無盡辯才，隨法隨義，次第開演。以於諸法，言辭辯說，皆得善巧；大慈大悲，悉已清淨。能於一切離文字法中，出生文字，與法與義，隨順無違，為說諸法悉從緣起。雖有言說而無所著，演一切法，辯才無盡，分別安立，開發示導，令諸法性，具足明顯，斷眾疑網，悉得清淨，雖攝眾生，不捨真實。於不二法而無退轉，常能演說無礙法門，以眾妙音，隨眾生心，普雨法雨而不失時。是名：菩薩摩訶薩第九一切法智神通。

佛子！菩薩摩訶薩，以一切法滅盡三昧智通，於念念中，入

一切法滅盡三昧。亦不退菩薩道，不捨菩薩事，不捨大慈大悲心，修習波羅蜜，未嘗休息；觀察一切佛國土，無有厭倦；不捨度眾生願，不斷轉法輪事，不廢教化眾生業，不捨供養諸佛行，不捨一切法自在門，不捨常見一切佛，不捨常聞一切法。知一切法平等無礙，自在成就一切佛法，所有勝願，皆得圓滿。了知一切國土差別，入佛種性，到於彼岸；能於彼彼諸世界中，學一切法，了法無相。知一切法皆從緣起，無有體性，然隨世俗，方便演說；雖於諸法，心無所住，然順眾生諸根欲樂，方便為說種種諸法。

此菩薩住三昧時，隨其心樂，或住一劫，或住百劫，或住千劫，或住億劫，或住百億劫，或住千億劫，或住百千億劫，或住那由他億劫，或住百那由他億劫，或住千那由他億劫，或住百千那由他億劫，或住無數劫，或住無量劫，乃至或住不可說不可說劫。菩薩入此，一切法滅盡三昧，雖復經於爾所劫住，而身不離散、不羸瘦、不變異，非見非不見，不滅不壞，不疲不懈，不可盡竭。雖於有於無，悉無所作，而能成辦諸菩薩事，所謂：恆不捨離一切眾生，教化調伏未曾失時，令其增長一切佛法，於菩薩行悉得圓滿。為欲利益一切眾生，神通變化無有休息，譬如光影，普現一切，而於三昧，寂然不動。是為菩薩摩訶薩，入一切法滅盡三昧智神通。

佛子！菩薩摩訶薩住於如是十種神通，一切天人不能思議，

一切眾生不能思議，一切聲聞、一切獨覺，及餘一切諸菩薩眾，如是皆悉不能思議。此菩薩身業不可思議，語業不可思議，意業不可思議，三昧自在不可思議，智慧境界不可思議，唯除諸佛，及有得此神通菩薩，餘無能說此人功德、稱揚讚歎。佛子！是為菩薩摩訶薩十種神通。若菩薩摩訶薩住此神通，悉得一切三世無礙智神通。」

## 十忍品第二十九

爾時，普賢菩薩告諸菩薩言：「佛子！菩薩摩訶薩有十種忍，若得此忍，則得到於一切菩薩無礙忍地，一切佛法無礙無盡。何者為十？所謂：音聲忍、順忍、無生法忍、如幻忍、如燄忍、如夢忍、如響忍、如影忍、如化忍、如空忍。此十種忍，三世諸佛已說、今說、當說。」

佛子！云何為菩薩摩訶薩音聲忍？謂聞諸佛所說之法，不驚、不怖、不畏，深信悟解，愛樂趣向，專心憶念，修習安住。是名：菩薩摩訶薩第一音聲忍。

佛子！云何為菩薩摩訶薩順忍？謂於諸法，思惟觀察，平等無違，隨順了知，令心清淨，正住修習，趣入成就。是名：菩薩摩訶薩第二順忍。

佛子！云何為菩薩摩訶薩無生法忍？佛子！此菩薩摩訶薩，

不見有少法生，亦不見有少法滅。何以故？若無生則無滅，若無滅則無盡，若無盡則離垢，若離垢則無差別，若無差別則無處所，若無處所則寂靜，若寂靜則離欲，若離欲則無作，若無作則無願，若無願則無住，若無住則無去無來。是名：菩薩摩訶薩第三無生法忍。

佛子！云何為菩薩摩訶薩如幻忍？佛子！此菩薩摩訶薩，知一切法皆悉如幻，從因緣起，於一法中解多法，於多法中解一法。此菩薩知諸法如幻已，了達國土，了達眾生，了達法界，了達世間平等，了達佛出現平等，了達三世平等，成就種種神通變化。譬如幻，非象非馬，非車非步，非男非女，非童男非童女，非樹非葉，非華非果，非地非水，非火非風，非晝非夜，非日非月，非半月非一月，非一年非百年，非一劫非多劫，非定非亂，非純非雜，非一非異，非廣非狹，非多非少，非量非無量，非麤非細，非是一切種種眾物。種種非幻，幻非種種，然由幻故，示現種種差別之事。菩薩摩訶薩亦復如是，觀一切世間如幻，所謂：業世間、煩惱世間、國土世間、法世間、時世間、趣世間、成世間、壞世間、運動世間、造作世間。菩薩摩訶薩，觀一切世間如幻時，不見眾生生，不見眾生滅；不見國土生，不見國土滅；不見諸法生，不見諸法滅；不見過去可分別，不見未來有起作，不見現在一念住；不觀察菩提，不分別菩提；不見佛出現，不見佛涅槃；不見住大願，不見入正住，不出平等性。是菩薩

雖成就佛國土，知國土無差別；雖成就眾生界，知眾生無差別；雖普觀法界，而安住法性，寂然不動；雖達三世平等，而不違分別三世法；雖成就蘊、處，而永斷所依；雖度脫眾生，而了知法界平等，無種種差別；雖知一切法遠離文字，不可言說，而常說法，辯才無盡；雖不取著化眾生事，而不捨大悲，為度一切轉於法輪；雖為開示過去因緣，而知因緣性無有動轉。是名：菩薩摩訶薩第四如幻忍。

佛子！云何為菩薩摩訶薩如燄忍？佛子！此菩薩摩訶薩，知一切世間同於陽燄。譬如陽燄，無有方所，非內非外，非有非無，非斷非常，非一色非種種色，亦非無色，但隨世間言說顯示。菩薩如是如實觀察，了知諸法，現證一切，令得圓滿。是名：菩薩摩訶薩第五如燄忍。

佛子！云何為菩薩摩訶薩如夢忍？佛子！此菩薩摩訶薩，知一切世間如夢。譬如夢，非世間、非離世間，非欲界、非色界、非無色界，非生非沒，非染非淨，而有示現。菩薩摩訶薩亦復如是，知一切世間悉同於夢，無有變異故，如夢自性故，如夢執著故，如夢性離故，如夢本性故，如夢所現故，如夢無差別故，如夢想分別故，如夢覺時故。是名：菩薩摩訶薩第六如夢忍。

佛子！云何為菩薩摩訶薩如響忍？佛子！此菩薩摩訶薩聞佛

說法，觀諸法性，修學成就，到於彼岸，知一切音聲，悉同於響，無來無去，如是示現。佛子！此菩薩摩訶薩觀如來聲，不從內出，不從外出，亦不從於內外而出；雖了此聲非內、非外、非內外出，而能示現善巧名句，成就演說。譬如谷響，從緣所起，而與法性無有相違，令諸眾生，隨類各解而得修學。如帝釋夫人阿修羅女，名曰：舍支，於一音中，出千種音，亦不心念令如是出。菩薩摩訶薩亦復如是，入無分別界，成就善巧隨類之音，於無邊世界中，恆轉法輪。此菩薩善能觀察一切眾生，以廣長舌相而為演說，其聲無礙，徧十方土，令隨所宜，聞法各異。雖知聲無起，而普現音聲，雖知無所說，而廣說諸法，妙音平等，隨類各解，悉以智慧而能了達。是名：菩薩摩訶薩第七如響忍。

佛子！云何為菩薩摩訶薩如影忍？佛子！此菩薩摩訶薩非於世間生，非於世間沒；非在世間內，非在世間外；非行於世間，非不行世間；非同於世間，非異於世間；非往於世間，非不往世間；非住於世間，非不住世間；非是世間，非出世間。非修菩薩行，非捨於大願，非實非不實。雖常行一切佛法，而能辦一切世間事，不隨世間流，亦不住法流。譬如日月、男子、女人、舍宅、山林、河泉等物，於油、於水、於身、於寶、於明鏡等清淨物中而現其影。影與油等，非一非異，非離非合，於川流中亦不漂度，於池井內亦不沈沒，雖現其中，無所染著。然諸眾生，知於此處有是影現，亦知彼

處無如是影；遠物、近物雖皆影現，影不隨物而有近遠。菩薩摩訶薩亦復如是，能知自身及以他身，一切皆是智之境界，不作二解：謂自、他別，而於自國土、於他國土，各各差別，一時普現。如種子中，無有根、芽、莖、節、枝、葉，而能生起如是等事；菩薩摩訶薩亦復如是，於無二法中，分別二相，善巧方便，通達無礙。是名：菩薩摩訶薩第八如影忍。

菩薩摩訶薩成就此忍，雖不往詣十方國土，而能普現一切佛剎。亦不離此，亦不到彼，如影普現，所行無礙，令諸眾生見差別身，同於世間堅實之相，然此差別即非差別，別與不別，無所障礙。此菩薩從於如來種性而生，身、語及意，清淨無礙，故能獲得無邊色相清淨之身。

佛子！云何為菩薩摩訶薩如化忍？佛子！此菩薩摩訶薩，知一切世間皆悉如化。所謂：一切眾生意業化，覺想所起故；一切世間諸行化，分別所起故；一切苦樂顛倒化，妄取所起故；一切世間不實法化，言說所現故；一切煩惱分別化，想念所起故。復有清淨調伏化，無分別所現故；於三世不轉化，無生平等故；菩薩願力化，廣大修行故；如來大悲化，方便示現故；轉法輪方便化，智慧無畏辯才所說故。菩薩如是了知世間、出世間化，現證知，廣大知，無邊知，如事知，自在知，真實知，非虛妄見所能傾動，隨世所行亦不失壞。

譬如「化」，不從心起，不從心法起；不從業起，不受果報；非世間生，非世間滅；不可隨逐，不可攬觸；非久住，非須臾住；非行世間，非離世間；不專繫一方，不普屬諸方；非有量，非無量；不厭不息，非不厭息；非凡非聖；非染非淨；非生非死；非智非愚；非見非不見；非依世間，非入法界；非黠慧，非遲鈍；非取，非不取；非生死，非涅槃；非有，非無有。菩薩如是善巧方便，行於世間修菩薩道，了知世法，分身化往。不著世間，不取自身，於世於身，無所分別；不住世間，不離世間；不住於法，不離於法。以本願故，不棄捨一眾生界，不調伏少眾生界，不分別法，非不分別，知諸法性，無來無去，雖無所有，而滿足佛法，了法如化，非有非無。佛子！菩薩摩訶薩，如是安住如化忍時，悉能滿足，一切諸佛菩提之道，利益眾生。是名：菩薩摩訶薩第九如化忍。

菩薩摩訶薩成就此忍，凡有所作，悉同於化。譬如化土，於一切佛剎無所依住，於一切世間無所取著，於一切佛法不生分別，而趣佛菩提無有懈倦。修菩薩行，離諸顛倒，雖無有身，而現一切身；雖無所住，而住眾國土；雖無有色，而普現眾色；雖不著實際，而明照法性，平等圓滿。佛子！此菩薩摩訶薩於一切法，無所依止，名：解脫者。一切過失，悉皆捨離，名：調伏者。不動不轉，普入一切如來眾會，名：神通者。於無生法，已得善巧，名：無退者。具一切力，須

彌、鐵圍不能為障，名：無礙者。

佛子！云何為菩薩摩訶薩如空忍？佛子！此菩薩摩訶薩，了一切法界猶如虛空，以無相故；一切世界猶如虛空，以無起故；一切法猶如虛空，以無二故；一切眾生行猶如虛空，無所行故；一切佛猶如虛空，無分別故；一切佛力猶如虛空，無差別故；一切禪定猶如虛空，三際平等故；所說一切法猶如虛空，不可言說故；一切佛身猶如虛空，無著無礙故。菩薩如是，以如虛空方便，了一切法皆無所有。佛子！菩薩摩訶薩以如虛空忍智，了一切法時，得如虛空身、身業，得如虛空語、語業，得如虛空意、意業。譬如虛空，一切法依，不生不歿；菩薩摩訶薩亦復如是，一切法身，不生不歿。譬如虛空，不可破壞；菩薩摩訶薩亦復如是，智慧、諸力，不可破壞。譬如虛空，一切世間之所依止，而無所依；菩薩摩訶薩亦復如是，一切諸法之所依止，而無所依。譬如虛空，無生無滅，能持一切世間生滅；菩薩摩訶薩亦復如是，無向無得，能示向得，普使世間修行清淨。譬如虛空，無方無隅，而能顯現無邊方隅；菩薩摩訶薩亦復如是，無業無報，而能顯示種種業報。譬如虛空，非行非住，而能示現種種威儀；菩薩摩訶薩亦復如是，非行非住，而能分別一切諸行。譬如虛空，非色非非色，而能示現種種諸色；菩薩摩訶薩亦復如是，非世間色、非出世間色，而能示現一切諸色。譬如虛空，非久非近，而能久住，現一切物；菩薩摩訶薩亦復如是

，非久非近，而能久住，顯示菩薩所行諸行。譬如虛空，非淨非穢，不離淨穢；菩薩摩訶薩亦復如是，非障非無障，不離障無障。譬如虛空，一切世間皆現其前，非現一切世間之前；菩薩摩訶薩亦復如是，一切諸法皆現其前，非現一切諸法之前。譬如虛空，普入一切，而無邊際；菩薩摩訶薩亦復如是，普入諸法，而菩薩心無有邊際。何以故？菩薩所作，如虛空故。謂：所有修習、所有嚴淨、所有成就，皆悉平等，一體、一味、一種分量，如虛空清淨，徧一切處，如是證知一切諸法，於一切法無有分別。嚴淨一切諸佛國土，圓滿一切無所依身。了一切方，無有迷惑；具一切力，不可摧壞；滿足一切無邊功德，已到一切甚深法處；通達一切波羅蜜道，普坐一切金剛之座，普發一切隨類之音，為一切世間轉於法輪，未曾失時。是名：菩薩摩訶薩第十如空忍。

菩薩摩訶薩成就此忍，得無來身，以無去故；得無生身，以無滅故；得不動身，以無壞故；得不實身，離虛妄故；得一相身，以無相故；得無量身，佛力無量故；得平等身，同如相故；得無差別身，等觀三世故；得至一切處身，淨眼等照無障礙故；得離欲際身，知一切法無合散故；得虛空無邊際身，福德藏無盡如虛空故；得無斷無盡法性平等辯才身，知一切法相唯是一相，無性為性如虛空故；得無量無礙音聲身，無所障礙如虛空故；得具足一切善巧，清淨菩薩行身，於一切處皆無障礙，如虛空故；得一切佛法海次第相續身，不

可斷絕如虛空故；得一切佛剎中現無量佛剎身，離諸貪著如虛空無邊故；得示現一切自在法無休息身，如虛空大海無邊際故；得一切不可壞堅固勢力身，如虛空任持一切世間故；得諸根明利，如金剛堅固不可壞身，如虛空一切劫火不能燒故；得持一切世間力身，智慧力如虛空故。佛子！是名菩薩摩訶薩十種忍。」

爾時，普賢菩薩摩訶薩，欲重宣其義，而說頌言：

譬如世有人	聞有寶藏處	以其可得故	心生大歡喜
如是大智慧	菩薩真佛子	聽聞諸佛法	甚深寂滅相
聞此深法時	其心得安隱	不驚亦不怖	亦不生恐畏
大士求菩提	聞斯廣大音	心淨能堪忍	於此無疑惑
自念以聞此	甚深微妙法	當成一切智	人天大導師
菩薩聞此音	其心大歡喜	發生堅固意	願求諸佛法
以樂菩提故	其心漸調伏	令信益增長	於法無違謗
是故聞此音	其心得堪忍	安住而不動	修行菩薩行
為求菩提故	專行向彼道	精進無退轉	不捨眾善輒
以求菩提道	其心無恐畏	聞法增勇猛	供佛令歡喜
如有大福人	獲得真金藏	隨身所應服	造作莊嚴具
菩薩亦如是	聞此甚深義	思惟增智海	以修隨順法
法有亦順知	法無亦順知	隨彼法如是	如是知諸法
成就清淨心	明徹大歡喜	知法從緣起	勇猛勤修習
平等觀諸法	了知其自性	不違佛法藏	普覺一切法

志樂常堅固  
以發精進意  
菩薩所入法  
如無等所說  
隨順佛所說  
三十三天中  
所食種種食  
菩薩亦如是  
無滅故無盡  
無異則無處  
專念於佛法  
勤求於十方  
此忍最為上  
菩薩住此忍  
了達三世法  
世間種種法  
諸業從心生  
譬如工幻師  
世間亦如是  
度脫諸眾生  
眾生及國土  
幻作男女形  
幻物無知覺

嚴淨佛菩提  
復修三昧道  
是佛所行處  
平等觀諸法  
成就此忍門  
所有諸天子  
不從十方來  
觀察一切法  
無盡故無染  
無處則寂滅  
未嘗有散動  
處世而不住  
了法無有盡  
普見諸如來  
寂滅清淨相  
一切皆如幻  
故說心如幻  
普現諸色像  
一切皆如幻  
令知法如幻  
三世所有法  
及象馬牛羊  
亦無有住處

不動如須彌  
無量劫勤行  
於此能了知  
非不平等忍  
如法而了知  
共同一器食  
如其所修業  
悉從因緣起  
於世變異法  
其心無染著  
而以悲願心  
無去亦無來  
入於真法界  
同時與授記  
而能化眾生  
若能如是知  
若離此分別  
徒令眾貪樂  
無性亦無生  
眾生不異幻  
如是悉無餘  
屋宅池泉類  
畢竟寂滅相

一心求正覺  
未曾有退失  
其心無厭怠  
能成平等智  
亦不分別法  
所食各不同  
自然咸在器  
無生故無滅  
了知無變異  
願度諸群生  
方便行於世  
方便善說法  
實亦無所入  
斯名受佛職  
置於善道中  
其心無所動  
普滅諸有趣  
畢竟無所得  
示現有種種  
了幻無眾生  
一切皆如幻  
園林華果等  
但隨分別現

菩薩能如是  
眾生及國土  
如是得善巧  
勇猛諸佛子  
眾想如陽燄  
眾生各別異  
十方諸眾生  
世間如陽燄  
譬如熱時燄  
眾生亦復然  
若離於諸想  
遠離憍慢心  
菩薩了世法  
諸法無分別  
夢體無生滅  
夢不在世間  
譬如夢中見  
住於夢定者  
眾生諸剝業  
菩薩所行行  
了世皆空寂  
是名如夢忍  
修行如是行

普見諸世間  
種種業所造  
寂滅無戲論  
隨順入妙法  
令眾生倒解  
形類非一種  
皆為想所覆  
以想有差別  
世見謂為水  
世趣皆無有  
亦離諸戲論  
除滅世間想  
一切皆如夢  
如夢不異心  
亦無有方所  
不在非世間  
種種諸異相  
了世皆如夢  
雜染及清淨  
及以諸大願  
不壞於世法  
因此了世法  
出生廣大解

有無一切法  
入於如幻際  
住於無礙地  
善觀一切想  
菩薩善知想  
了達皆是想  
若捨顛倒見  
知世住於想  
水實無所有  
如燄住於想  
愚癡著想者  
住盡無盡處  
非處非無處  
三世諸世間  
三界悉如是  
此二不分別  
世間亦如是  
非同非異  
如是悉了知  
明了皆如夢  
譬如夢所見  
疾成無礙智  
巧知諸法性

了達悉如幻  
於彼無依著  
普現大威力  
纏網於世間  
捨離一切倒  
一切無真實  
則滅世間想  
遠離三顛倒  
智者不應求  
無礙心境界  
悉令得解脫  
是菩薩方便  
體性恆寂滅  
一切悉如是  
見者心解脫  
得入於忍地  
與夢無差別  
非一非種種  
與夢皆平等  
與世亦無別  
長短等諸色  
廣度諸群生  
於法心無著

一切諸世間  
如聞種種響  
瞻仰諸如來  
如響無來處  
善了諸音聲  
了法不在言  
了知言語道  
如世所有音  
菩薩獲此忍  
為欲利世間  
普觀諸世間  
不住於世間  
了知世間性  
世間所有法  
心不離世間  
譬如水中影  
不於世住出  
入此甚深義  
世間無邊際  
觀察甚深法  
菩薩觀諸法  
隨順化自性  
一切諸世間

種種諸音聲  
心不生分別  
及聽說法音  
所聞聲亦然  
於聲不分別  
善入無言際  
具足音聲分  
示同分別法  
淨音化世間  
專意求菩提  
寂滅無體性  
不離於世間  
於性無染著  
悉知其自性  
亦不住世間  
非內亦非外  
以世不可說  
離垢悉明徹  
智入悉齊等  
利益群生眾  
諦了悉如化  
修習菩提道  
及以無量業

非內亦非外  
菩薩聞音聲  
演契經無量  
而能分別法  
知聲悉空寂  
而能示言說  
知聲性空寂  
其音悉周徧  
善巧說三世  
而常入法性  
而恆為饒益  
於世無所依  
雖不依世間  
了法無有二  
非於世間外  
菩薩求菩提  
亦不在內外  
不捨本誓心  
普化諸群生  
從此入於智  
而行如化行  
一切法如化  
平等悉如化

了之悉如響  
其心亦如是  
雖聞無所著  
與法無乖謬  
普出清淨音  
如響徧世間  
以世言音說  
開悟諸群生  
於世無所著  
於彼無分別  
修行意不動  
依處不可得  
化世令超度  
無二亦無著  
修行一切智  
了世非世間  
如影現世間  
普照智慧燈  
令其捨眾著  
修行一切道  
畢竟永不捨  
菩薩行亦然  
畢竟住寂滅

三世所有佛  
佛以大慈悲  
知世皆如化  
修習菩提行  
化法離分別  
化海了於智  
第十忍明觀  
獲此如空智  
成就空忍力  
虛空無體性  
虛空無初際  
如是觀法性  
自住如空法  
世間相差別  
唯以一方便  
智慧與音聲  
如是十種忍  
於此善修學  
通達此忍門  
所修廣大行  
捨我而修行  
眾生及剝塵  
菩薩能成就

一切亦如化  
度脫化眾生  
不分別世間  
莊嚴於化藏  
亦不分別法  
化性印世間  
眾生及諸法  
永離諸取著  
如空無有盡  
亦復非斷滅  
亦復無中後  
一切如虛空  
復為眾生說  
皆空無有相  
普入眾世間  
及以菩薩身  
佛子所修行  
成就廣大力  
成就無礙智  
其量不可得  
入於深法性  
尚可知其數  
如是十種忍

本願修諸行  
度脫亦如化  
化事種種殊  
無量善莊嚴  
此二俱寂滅  
化非生滅法  
體性皆寂滅  
如空無種種  
境界如虛空  
亦無種種別  
其量不可得  
無生亦無滅  
降伏一切魔  
入於無相處  
謂知三世法  
其性如虛空  
其心善安住  
法力及智力  
超過一切眾  
調御師智海  
心常住淨法  
菩薩諸功德  
智慧及所行

變化成如來  
化力為說法  
皆由業差別  
如業作世間  
菩薩行如是  
智慧亦如是  
如空無處所  
於世無所礙  
不作空分別  
智力亦如是  
菩薩智亦然  
菩薩之所得  
皆斯忍方便  
諸相悉平等  
悉等虛空性  
一切皆寂滅  
廣為眾生說  
為菩提方便  
轉於無上輪  
乃能分別知  
以是施群生  
無能度其限  
眾生莫能測

## 大方廣佛華嚴經第四十四

離婆離婆帝 求訶求訶帝 陀羅尼帝 尼訶囉帝  
毗黎你帝 摩訶伽帝 真陵乾帝 婆婆訶 (七遍)

南無喝囉怛那 哆囉夜耶 佢囉佢囉  
俱住俱住 摩囉摩囉 虎囉 吻 賀賀  
蘇怛擎 吻 澈抹擎 婆婆訶 (三遍)

普光再會 大法重宣 高超十聖與三賢  
等覺義幽玄 心月孤圓 究竟離言詮  
南無華嚴海會佛菩薩 (三唱)

願以此功德 莊嚴佛淨土 上報四聖恩 下濟六凡苦  
所有法界眾 悉修菩提行 盡此一報身 同生極樂國